

haere ki taua motu ko Kerehona Piwaka. E rua nga take i mauria ai ia e au hei hoa moku : tetahi he whakaputa i te aroha o te Hahi Maori ki te mahi a te Hahi ki roto ki nga iwi o nga motu o Meranihia ; tetahi, kia korerotia ai e ia ki konei nga korero o taua mahi hei whakaobo i a koutou kia ngahau ki te awhina i taua mahi pai. I haere ano i a matou tetahi o nga Minita Maori o te pito whakararo o te motu nei, a Renata Tangata. He nui te manaaki a Te Herewini Pihopa i a raua ; i kiia hoki raua e ia he tamariki na tona papa. I to matou hokinga mai ka tukua mai e ia tenei kupu ki nga tangata o te Hahi Maori o tenei motu : “ He tangata ahau no Ngapuhi. Ka nui te hari o toku ngakau i toku kitenga i enei tangata tokorua, i nga karere o te Hahi Maori ka tae mai nei ki tenei motu. Ki te rongo te tamaiti kei te mate tona whaea, ka kore he ngakau ki te mahi i tana mahi. Kia rongo ahau ki toku whaea, ara ki te Hahi Maori, kei te ora, ka ora toku ngakau, ka kaha oku ringaringa ki te mahi. He kupu poroporoaki tenei naku ; Haere korua, korero atu ki te iwi nana nei korua i tonono mai, ko ta tatou mahi i konei, i Niu Tirani hoki, he mahi kotahi. Whakamatea nga tarutaru kino o te mara ; ruia te purapura pai o te Rongo pai i runga i te kaha o te Wairua Tapu.”

No te ra o Rukà, 18 o Oketopa i mua ake nei i motuhia ai a Hoani Te Wainohu hei Piriti, a Manahi Te Aro raua ko Nirai Runga hei Rikona. I a Te Wiremu Atirikona ratou katoa e kura ana i Turanganui. Ko te kura tera e puta ai he tangata mo te mahi minita mo enei wa e haere ake nei. Ko nga taitamariki ia mo taua kura me tiki i nga kura ke, ara i Te Aute, i a Tipene. Ko nga tamariki hoki o enei kura, ehara i te mea no te kainga kotahi, engari no ia wahi, no ia wahi ; koia i tika ai kia puta te uaua o koutou, o nga Minita, o nga Mangai hoki o te iwi, ki te whakakaha i nga kura o o koutou kainga, i nga kura Ratapu hoki, kia pai ai te tupu ake o nga tamariki. Penei, ki te tau mai ta te Atua manaakitanga, ka noho pai te iwi, ka whai tangata hoki hei mahi i ta te Atua mara. Ehara hoki i te mea ko koutou anake hei whakaarohanga ma koutou. Ma te ata mahi o to tatou nei wahi ka hoki ake ai ki te pai nga wahi kua ururuatia, ka puta atu ai hoki te kupu a te Atua ki nga iwi e noho nei inaianei i roto i te pouiri. Kia puta a tatou inoi kia homai e te Atua tona Wairua Tapu hei whakamarama, hei whakakaha i a tatou, kia waiho ai tenei huihuinga o tatou hei mea e nui haere ai te u o te Rongo pai o to tatou Ariki, o Ihu Karaiti, ki roto ki a tatou, e horapa atu ai hoki te matauranga ki tana whakaoranga ki era atu iwi.